

# Dr. Mahathir melawat Korea Selatan Isnin ini

**KUALA LUMPUR, Khamis.**— Lawatan rasmi Datuk Seri Dr. Mahathir Mohamad ke Korea Selatan mulai Isnin ini akan membuka jalan kepada banyak lagi projek usahasama antara kedua negara, demikian kata Setiausaha Pertama Ekonomi Kedutaan negara itu, Encik Paik Sun Koon.

Beliau memberitahu hari ini, masanya tepat sekarang bagi kalangan swasta di kedua negara mengambil dayausaha membuka lebih banyak projek usahasama dan meningkatkan perdagangan.

Timbalan Perdana Menteri dan Datin Seri Dr. Siti Hasmah beserta 17 pegawai berlepas Ahad ini untuk lawatan enam hari ke Republik tersebut.

Lawatan tersebut adalah memenuhi undangan Timbalan Perdana Menteri Korea Selatan, Encik Shin Byong Hyun.

Semasa di sana Datuk Seri Dr. Mahathir akan berbincang dengan para pemimpin Republik itu mengenai perkara-perkara kepentingan bersama.

Datuk Seri Dr. Mahathir yang juga Menteri Perdagangan dan Perusahaan akan berunding dengan rakan sejawatnya Encik Suh Suk Joon dan melawat Perbadanan Industri Ekport Korea dan Pusat Penyelidikan Penapisan Gula Jell di Seol.

Bellau juga akan melawat Limbungan Kapal Okpo, Kompleks Industri Kejenteraan Chang Won, perkampungan Saemaul, dan bandar Kyongju.

Datin Seri Dr. Siti Hasmah mempunyai acara lawatan berasingan meliputi lawatan ke Galeri Kesenian Duksoo, Universiti Wanita Ewha, Pusat Rawatan Universiti Yonsei dan Pusat Pemuliharaan Anak-anak Sam Yook. — Bernama.

Bahan asal dari Arkib  
Negara Malaysia